

»sacris litteris repugnare.» Ergo sunt, inter infideles, quibus deest gratia fidei.

*R. Dist. conseq.* Quibus deest gratia fidei efficax aut proxime sufficiens, *conc.*; etiam gratia remote sufficiens, *nego conseq.*

Cæterum, ut quæstio rectius intelligatur, et solutio earum objectionum magis evidens fiat, distinguendum est inter gratias fidem præcedentes, et gratias fidei aut fidem sequentes. Priores hominem non elevant ad statum supernaturale, sed tantum illum adjuvant ad bonum morale, videlicet ad legem naturalem naturaliter implendam. Postiores vero sunt principia operum supernaturalium, et hominem conducere possunt ad salutem.

*Inst.* Idem S. Aug., lib. de Gestis Pelagii, cap. 14, n. 34, dicit fidem esse *initium unde bona opera incipiunt*, et sic in variis aliis locis : ergo infideles, quibus deest fides, nullius boni sunt capaces.

*R. Nego conseq.* Nam fides est quidem initium bonorum operum supernaturalium, quod omnes fatentur, sed non est initium conversionis, nec igitur prima gratia; dantur quippe gratiae quibus infideles præveniuntur et ad fidem disponuntur : ergo fides non est prima gratia, ut Clemens XI definivit, propositionem *Quesnel* modo citatam dammando, nec igitur initium omnium bonorum operum, sine ulla exceptione.

Eodem sensu intelligenda sunt verba concilii Trident., sess. 6, cap. 8 : *Fides est humanæ salutis initium.*

*Dices 2º* : Sequens Baii propositio, n. 68 : *Infidelitas pure negativa, in his quibus Christus non est prædicatus, peccatum est*, damanata fuit : unde sequitur infidelitatem negativam non esse peccatum : at si cunctis infidelibus concedantur vel offerantur gratiae sufficietes, infidelitas etiam negativa erit peccatum. Ergo.

*R. Nego min.* Illud enim non imputatur ad peccatum quod non fuit volitum, saltem in sua causa : atqui infidelitas negativa non fuit volita in causa, nempe in abuso gratiae remote sufficientis; aliquid enim non censetur volitum in causa, nisi prævismus fuerit aut prævideri po-

tuerit : atqui infideles negativi non præviderunt, nec prævidere potuerunt fidem sibi denegandam fore propter abusum gratiae remote sufficientis : ergo hæc infidelitas ipsius non imputanda est quasi esset peccatum.

Eo sensu, S. Aug. intellexit obdurationem cordis esse penam peccati, non vero peccatum.

SECTIO QUARTA.—An gratia sufficiens concessa vel præparata fuerit omnibus Judæis in veteri Lege.

Certum est Judæos justificari non potuisse *per ipsam litteram legis Moysi*, sunt verba conc. Trid., sess. 6, c. 1 : quia *lex subintravit*, inquit Apostolus, Rom. v, 20, *ut abundaret delictum*, id est, ut cognosceretur delictum, vel ut occasione legis ex malitia hominis abundaret delictum; vim autem illud auferendi non habebat. Multi tamen justificati sunt sub veteri lege, sed fide in Christum venturum, ut Abel, Henoch, Noe, Abraham, etc. Multis ergo Judæis concessæ sunt gratiae sufficietes et efficaces tempore veteris legis : difficultas est an cunctis Judæis concessæ vel oblatæ fuerint gratiae saltem remote sufficientes. Negant iterum Jansenius et asseclæ ejus ; affirmant vero omnes catholici.

#### PROPOSITIO.

*Cunctis Judæis in veteri Lege concessæ vel oblatæ fuerunt gratiae saltem remote sufficientes.*

*Prob.* Scriptura sacra, auctoritate Clementis XI, testimonio S. Aug. et S. Thom. et ratione.

1º *Scriptura sacra*. Deut. xxx, 11 : *Mandatum hoc quoa ego præcipio tibi hodie non supra te est*; ibi agitur de tota lege, ut ex versibus sequentibus patet : ergo Judæi totam legem implere poterant : porro illam totam implere non poterant sine gratia, *ex dictis supra*, pag. 317 : ergo 1º.

2º *Auctoritate Clementis XI*, qui sequentem damnavit propositionem *Quesnel*, n. 7 : «Quæ utilitas pro homine in veteri fœdere, in quo Deus illum reliquit propriæ infirmitati, imponendo ipsi legem suam?» Ergo homo adjuvabatur gratia, quæ certe debebat esse sufficiens.

3º *Testimonia S. Aug.* qui, lib. de Spiritu et Littera, cap. 19, ait : « Lex ergo data est ut gratia quereretur, et » gratia data est ut lex impleretur. Neque enim suo vitio » non implebatur lex, sed vitio prudentiae carnis, quod » vitium per legem demonstrandum, per gratiam sanan- « dum fuit. » Lex semper impleri potuit, non potuit im- pleri sine gratia : ergo.

*S. Thom.* qui, 1 2, q. 98, art. 2, ad 4, sic habet : « Di- » cendum quod, quamvis lex vetus non sufficeret ad salvan- » dos homines, tamen aderat aliud auxilium a Deo homini- » bus simul cum lege, per quod salvari poterant, scilicet » fides Mediatoris. » *Ita cæteri doctores catholici.* Ergo 3º.

4º *Ratione.* Judæi totam legem implere tenebantur sub peccato, ut patet perpetuis exhortationibus Prophetarum: atqui implere non poterant sine gratia, confitebit ipso Jansenio : ergo vel omnes gratia sufficienti donabantur, vel peccatum erat necessarium: porro peccatum necessarium omni sensu repugnat, quidquid in contrarium affirmare audeat Jansenius qui, lib. 3 de Gratia Christi, dicere non erubescit *Vetus Testamentum nihil aliud fuisse quam magnam quandam quasi comœdiām.* Ergo 4º, etc. Aliunde, etc. Ergo.

*Dices 1º :* Lex vetus saepe vocatur ab Apostolo *lex mor- tis, lex peccati.* Ergo.

*R. Dist. ant.* Sæpe vocatur *lex mortis, lex peccati*, per oppositionem ad legem gratiæ quæ dat vitam et delet peccatum, *conc.*; quia talis est in se et gratiam excludit, *nego ant.* Ratio hujus distinctionis desumitur ex dictis in initio præsentis distinctionis.

Lex vetus dicitur etiam *lex peccati et lex mortis*, quia erat occasio peccati, ostendendo malum vitandum et non ex se conferendo vires ad vincendum, ideoque, non ex se, sed propter malitiam hominis, deducebat ad mortem.

*Dices 2º :* *S. Aug.* variis in locis, v. g., in serm. 9 de Decem chordis, dicit amorem in veteri lege non exstitisse, sed timorem : atqui cum solo timore non datur gratia sufficiens : ergo.

*R. 1º. Nego maj.* Nam lib. de moribus Ecclesiæ, cap. 28,

redarguit ex professo Manichæos, qui, convenientes Deum et proximum diligendos esse, negabant hoc in Veteri Testamento contineri. Quando dicit amorem in veteri lege non exstitisse, et alia hujusmodi, haec accipienda sunt tantum in sensu relativo, scilicet ut vividius innotescat præcipuus character novæ legis, qui est charitas.

*R. 2º. Nego min.* Nam, *Initium sapientie timor Domini*, Psalm. cx, 10 : ergo cum timore dari potest gratia saltem remote sufficiens quæ ad dilectionem ducere potest.

*Dices 3º :* Multum datur discriben inter veterem et novam legem : atqui jam dici non potest tale existere discriben inter utramque, si omnibus Judæis sub veteri lege date fuerint gratiæ sufficietes : ergo.

*R. Nego min. ob multiplicem rationem :* 1º lex vetus non continebat gratiam, lex nova eam habet et producit; 2º multo uberior est gratia in nova lege quam in veteri; 3º gratia in veteri lege non istius, sed novæ legis erat, si quidem non concedebatur, nisi intuitu meritorum Christi; 4º lex vetus recte dicitur *lex timoris, lex sterilis, lex mortis*, etc., dum lex nova merito vocatur *lex dilectionis, lex gratiæ, lex vitaæ*, etc. Ergo.

#### SECTIO QUINTA.—An ipsis parvulis dentur gratiæ sufficietes.

Non agitur 1º de parvulis qui gratia baptismatis vel privilegio martyrii, ut SS. Innocentes, regenerantur; certum est enim gratiam illis non deesse.

Non agitur 2º de gratia intellectus et voluntatis, illius quippe non sunt capaces; sed de gratia externa qua saluti eorum sufficienter provideatur.

Non agitur 3º de concessione illius gratiæ, siquidem hic agitur de iis qui illam non recipiunt; sed petitur an omnibus parvulis præparetur medium quo salvari possint.

Non agitur iterum 4º de parvulis Christianorum qui nascuntur et vivunt; remedium enim ipsis a Deo paratum est et sola parentum aut vicinorum culpa non applicatur.

5º Eadem ratio esse videtur pro iis qui in utero matrum culpa parentum aut aliorum suffocantur; si enim benefi-

cium remedii ipsis destinati non percipient, hoc parentibus aliisve tribuendum est, et non Deo, qui illius applicationem sincere volebat.

Itaque tota difficultas versatur circa parvulos infidelium baptismia penitus ignorantium, et maxime circa eos qui in utero matrum vi legum naturae decadunt. Plures, inter quos *Vasquez*, fatentur eos gratia vere sufficienti destitutos esse, idque sine ulla injustitia ex parte Dei, qui poterat Salvatorem non concedere, et dato Salvatore, nemini debet gratias ad salutem necessarias. Sufficit ut infantes cum solo originali peccato decedentes non eodem modo plectat ac adultos peccatis actualibus commaculatos : atqui certe non ita eos plectit, cum sit fons et regula omnis justitiae. Itaque, seposita vana curiositate, inscrutabilia ejus decreta adoranda sunt, et dicendum : *Justus es, Domine, et rectum judicium tuum*, Ps. cxviii, 137.

Attamen communissime docent theologi Deum sincere velle salutem hujusmodi parvolorum, iisque sufficienter providisse; nam, inquit, constat ex Scriptura Deum velle *omnes homines salvos fieri* : ergo vel hujusmodi parvuli non sunt homines, vel dicendum est Deum eis sufficienter providisse : atqui defendi non potest eos non esse homines : ergo.

At explicare modum quo eis sufficienter providerit, opus arduum est, vires humanas superans. Duæ tamen potissimum celebrantur hypotheses quas breviter exponemus.

1<sup>a</sup> sic se habet : Ut Deus saluti hujusmodi parvolorum providisse censeatur, haec sufficient : 1<sup>o</sup> illum instituisse remedium generale, a quo nullum excluserit ; 2<sup>o</sup> illud per causas secundas applicandum eis sincere offerre ; 3<sup>o</sup> causis secundis per specialem providentiam derogare non teneri, et 4<sup>o</sup> vi hujusmodi causarum, accidere prædictos infantes sine baptismo decedere : atqui haec omnia admitti possunt, nullam quippe involvere videntur repugnantiam : ergo.

2<sup>o</sup> Hypothesis tenet infantes in utero materno non præfocari nisi culpa aut negligentia parentum, qui, si gratiis sibi concessis recte usi fuissent, eos ad lucem et ad bap-

tismatis gratiam conduxisserint. Idem, *a fortiori*, dicunt de parvulis infidelium ante usum rationis decedentibus : si gratia regenerationis careant, hoc fit sola culpa vel negligentia parentum, qui recte vivendo gratiam fidei obtinuerint, eamque infantibus suis transmittere potuissent. Ergo.

Neutra solutio plene satisfacit ; imo, utraque gravibus impugnari potest rationibus ; nec tamen aliam planiorem novimus. Itaque difficultatem relinquimus insolutam, et statim quærimus an Deus sincere velit omnes homines salvos fieri.

#### SECTIO SEXTA.—An Deus sincere velit omnes homines salvos fieri.

Sub multiplici respectu consideratur voluntas Dei ; sed sepositis iis quæ ad scopum nostrum præsentem non pertinent, haec statuimus :

Dividitur 1<sup>o</sup> in antecedentem et consequentem. *Antecedens* ea est qua Deus vult aliquod in se, ab omnibus circumstantiis, juxta nostrum concipiendi modum, abstrahendo, v. g., voluntas qua creando homines in justitia, voluit eos ad gloriam pervenire. Voluntas *consequens* illa est qua vult aliquid propter aliud, v. g., damnationem quorumdam hominum propter eorum peccata.

Dividitur 2<sup>o</sup> in absolutam et conditionatam. Voluntas Dei est *absoluta* quando illius effectus a nulla pendet conditione : talis fuit voluntas creandi mundum. Est autem *conditionata*, si effectus ab aliqua conditione pendeat, qualis est voluntas salvandi justos, si in justitia perseverent.

Dividitur 3<sup>o</sup> in efficacem et inefficacem. Voluntas *efficax* ea est qua Deus vult et producit effectum, non obstantibus qualibuscumque causis : inefficax vero ea est quæ ab aliqua pendens conditione suum non obtinet effectum, quia deest conditio.

*Certum est* 1<sup>o</sup> Deum, creando Adam in justitia, voluisse, voluntate antecedente, ejus et totius generis humani salutem ; alium quippe finem sibi proponere non potuit ; sed voluntas ista fuit conditionata.

*Certum est* 2º illum, posito peccato originali, statuisse, voluntate consequenti absoluta, Salvatorem hominibus concedere.

Verum petitur an, promittendo Salvatorem, sinceram habuerit voluntatem omnes homines adjutorio ejus salvari posse, et omnibus præstiterit auxilia etiam relative sufficientia?

Circa hoc punctum errarunt 1º Pelagiani, asserentes Deum æqualiter salutem omnium velle, omnesque solis naturæ viribus salvari posse;

2º Prædestinatiani, affirmantes Deum solos electos salvari velle, atque pro iis solis Christum mortuum esse;

3º Calviniani, inter quos alii censem Deum quorumdam tantum salutem velle, et alios a gloria etiam ante peccatum originale exclusisse, dicunturque *Antelapsarii*; et alii contendentes quosdam, posito peccato originali, a salute exclusos esse, et idcirco vocantur *Poslapsarii*;

4º Janseniani, qui, fatentes Deum ante peccatum originale salutem omnium voluisse, contendunt illum, post peccatum originale, solos electos salvari velle, eisque solis gratias relative sufficientes præparavisse.

Non negant tamen aliis offerri gratias, sed parvas, debiles et in praesentibus circumstantiis ad vincendam cupiditatem insufficientes.

Catholici vero doctores censem Deum salutem omnium velle, ipsisque, vel saltem aliis quam prædestinatis, gratias relative sufficientes concedere vel offerre.

Nonnulli tamen, ut *Cardinalis Sfondrat et Vasquez*, excipiunt infantes sine baptimate decedentes, asseruntque gratias vere sufficientes ipsis deesse.

Cum salus obtineri non possit nisi per Christum, certum est Christum mortuum esse pro iis omnibus quorum Deus vult salutem, et Deum velle salutem eorum pro quibus mortuus est Christus. Extra dubium est Christum pro omnibus mortuum esse ratione sufficientia pretii redemptio-nis; cum enim ipsius merita insuiri sint valoris, omnia peccata existentia et possibilia expiare possunt. Quæritur autem an Christus moriens pretium sanguinis sui pro om-

nibus obtulerit, et gratias relative sufficientes omnibus præparaverit.

*His notatis*, duas sequentes statuemus propositiones.

#### PROPOSITIO PRIMA.

*De fide est Deum velle salutem aliorum quam prædestinatiorum, et Christum pro aliis quam prædestinatis mortuum esse.*

*Prob.* Illa propositio tenenda est quæ est de fide, probatur Scriptura sacra, testimonio SS. Patrum, auctoritate cleri Gallicani, et ratione: atqui propositio nostra est de fide, probatur Scriptura sacra, etc.

1º *Est de fide.* In Symbolo enim Constantinopolitano, singulis diebus dominicis et festivis cantamus: *Qui propter nos homines et propter nostram salutem descendit de cœlis, et incarnatus est.... Crucifixus pro nobis, passus et sepultus est.* Ergo singuli fideles credere tenentur Deum velle eorum salutem, Christum pro seipsis mortuum esse: atqui tamen omnes non sunt prædestinati: ergo.

Insuper, quinta Propositio Jansenii, eo sensu intellecta quod Christus pro salute duntaxat prædestinatorum mortuus sit, a summis pontificibus Innocentio X et Alexandro VII damnata est ut hæretica, et Constitutiones eorum ab omnibus ecclesiis receptæ sunt. Ergo.

2º *Prob. Scriptura sacra.* Joan. VI, 39: *Hæc est autem voluntas ejus qui misit me Patris, ut omne quod dedit mihi non perdam ex eo, sed resuscitem illud in novissimo die.* Attamen omnes qui credunt in Christum, seu qui illi dati sunt, non salvantur, ut ipse ait, Joan. XVII, 12: *Quos dedisti mihi custodivi, et nemo ex iis periret, nisi filius perditionis.* Jansenistæ verterunt quidem in Novo Testamento Montensi, *sed filius perditionis*, ponendo *sed loco nisi*, quasi filius perditionis non fuisset ex iis quos Pater dererat Filio. Verum hæc interpretatio admitti non potest; 1º quia textui sacro contraria est; 2º quia sensui interpretum ac theologorum adversatur; 3º quia versio Montensis a Clemente IX et Innocentio XI reprobata est.

Ibid. v, 40 : *Hæc est autem voluntas Patris mei qui misit me, ut omnis qui videt Filium et credit in eum, habeat vitam æternam.* Porro omnes qui credunt in Filium non salvantur. Ergo.

B. Paulus, I Cor. viii, 11 : *Peribit infirmus in tua scientia, frater, propter quem Christus mortuus est.* Apostolus igitur arbitrabatur illum propter quem Christus mortuus est perire posse, et vult ut de salute ejus auxili simus : atqui tamen nullus esset timendi locus, si Christus pro solis prædestinatis mortuus esset, aut saltem ille propter quem Christus mortuus est perire non posset : ergo 2º.

3º *Testimonio SS. Patrum, S. Ambros., lib. de Paradiso, cap. 8 :* « *Venerat Dominus Jesus omnes salvos facere peccatores : etiam circa impios ostendere debuit suam voluntatem, et ideo nec proditorem debuit præterire.* »

S. Aug., lib. 2 de Symbolo ad catechiz., cap. 8, inducit Christum Judæos sic alloquenter : « *Videtis vulnera quæ infelixistis ; agnoscite latus quod pupugistis, quoniam per vos et propter vos apertum est, nec tamen intrare voluistis.* » Unde sic : Judas proditor et ii a quibus Christus crucifixus est non erant prædestinati : atqui juxta S. Ambros. et S. Aug., Christus pro iis mortuus est : ergo.

4º *Auctoritate cleri Gallicani* qui, in comitiis anni 1714, edidit documentum pastorale, ab aliis episcopis per Galliam dispersis acceptum, in quo legitur : « *Dire que Jésus-Christ n'est mort que pour le salut des seuls prédestinés, c'est précisément le sens hérétique condamné dans la cinquième Proposition de Jansénius.* » Ergo 4º.

5º *Ratione.* Omnes sperare tenemur vitam æternam per merita Christi nobis promissam esse, et unusquisque dicere potest de Christo : *Dilexit me, et tradidit semetipsum pro me,* Gal. ii, 20 : atqui non sumus omnes prædestinati. Ergo 5º, etc. Aliunde, etc. Ergo.

Inferendum est Christum mortuum esse saltem pro omnibus qui aliquando justificantur, licet in justitia non perseverent ; nam sola gratia justificantur, et omnis gratia est fructus redemptoris Christi : ergo.

## PROPOSITIO SECUNDA.

*Certum est Deum velle salutem omnium hominum et Christum pro omnibus mortuum esse,*

*Prob.* Illa propositio habenda est ut certissima quæ probatur Scriptura sacra, conciliis, SS. Patrum testimoniis, et ratione : atqui propositio nostra probatur, etc.

1º *Scriptura sacra.* Rom. viii, 32 : *Qui proprio Filio suo non pepercit, sed pro nobis omnibus tradidit illum.*

I Tim. ii, 3, 4, 5 et 6 : *Hoc enim bonum est et acceptum coram Salvatore nostro Deo, qui omnes homines vult salvos fieri et ad agnitionem veritatis venire. Unus enim Deus, unus et mediator Dei et hominum, homo Christus Jesus, qui dedit redemptionem semetipsum pro omnibus.*

II Cor. v, 14, 15 : *Charitas Christi urget nos : aestimantes hoc, quoniam si unus pro omnibus mortuus est, ergo omnes mortui sunt ; et pro omnibus mortuus est Christus.* Unde sic : Ubi Scriptura non distinguit, nec nos distinguere debemus : atqui Scriptura tradit Deum velle omnes salvos fieri. Christum pro omnibus mortuum esse, et nullam exprimit nec insinuat distinctionem ; imo dicit Christum esse unum mediatorem hominum, sicut unus est Deus, et pro iis mortuum esse qui mortui sunt in Adamo : atqui unus est Deus respectu omnium hominum, et omnes mortui sunt in Adamo : ergo Christus pro omnibus mortuus est.

II Petr. iii, 9 : *Non tardat Dominus promissionem suam, sicut quidam existimant, sed patienter agit propter nos, nolens aliquos perire, sed omnes ad paenitentiam reverti.* Nonne sensus horum verborum est Deum salutem omnium velle, et redemptionem Christi omnibus paratam esse ? Ergo 1º.

2º *Conciliis*, nempe conciliis adversus Prædestinatianos celebratis, in quibus definitum est non pro solis electis Christum mortuum esse, et æquivalenter, nec obscure, neminem a redemptione ejus exclusum esse ; insuper, conc. Trid., sess. 6, c. 2, haec habet : « *Hunc (Christum) proposuit Deus propitiatorem per fidem in sanguine ip-*

» sius pro peccatis nostris, non solum autem pro nostris,  
» sed etiam pro totius mundi. » Ergo 2º.

3º *SS. Patrum testimonis.* S. Ambros. in Ps. CXVIII, ait : « Sol justitiae omnibus ortus est, omnibus venit, omnibus  
» passus est et omnibus resurrexit. Si quis autem non cre-  
» dit in Christum generali beneficio ipse se fraudat ; ut si  
» quis, clausis fenestrīs, solis radios excludat, non ideo  
» sol non est ortus omnibus quia calore ejus se ipse frau-  
» daverit. » Nihil expressius desiderari potest, et pro ge-  
» nerali voluntate Dei salvandi omnes homines, et pro obla-  
» tione Christi, et pro libertate humana. Ergo.

S. Aug., lib. de Spiritu et Littera, cap. 33 : « *Vult Deus omnes homines salvos fieri, et in agnitionem veritatis venire;* non sic tamen ut eis adimat liberum arbitrium,  
» quo vel bene vel male utentes, justissime judicentur.  
» Quod cum sit, infideles quidem contra voluntatem Dei  
» faciunt, cum ejus Evangelio non credunt. » Enarrat. in Psal. xciv, ait : « Nam judicabit (Deus) orbem terrarum  
» in æquitate, non partem, quia non partem eruit; totum  
» judicare debet, quia pro toto pretium dedit. » Idem  
S. Doctor evidenter habet in pluribus aliis locis. Ergo 3º.

4º *Ratione.* De fide est Christum pro aliis quam prædestinatis mortuum esse : atqui, hoc posito, pro omnibus mortuus est; vel enim pro omnibus mortuus est, vel qui-  
dam excludendi sunt : atqui posterius dici non potest ; haec enim exclusio pronuntiari nequit, nisi Scriptura aut traditione innititur : porro, nec Scriptura nec traditione innititur : ergo 4º, etc. Aliunde, etc. Ergo.

#### *Solvuntur objectiones.*

*Obj. 1º.* Isai. XLVI, 10 : *Omnis voluntas mea fiet;* et Ps. CXIII, 11 : *Omnia quæcumque voluit, fecit.* Unde sic : Multi homines non salvantur ; attamen omnia quæ Deus vult sincere, fiunt. Ergo.

*R. Dist. min.* Quæ Deus vult sincere voluntate absoluta et efficaci, fiunt, *conc.*; quæ vult conditionaliter, *nego.* Porro Deus vult omnes homines salvos fieri, sub conditione

quod sua libertate et gratia sibi oblata recte utantur.  
Ergo.

*Obj. 2º.* Matth. XXVI, 28 : *Hic sanguis meus qui pro multis effundetur : ergo Christus pro multis, non vero pro omnibus mortuus est.*

*R. Nego conseq.* Nam multi pro omnibus hic sumuntur, quia simul sunt omnes et multi. Unde S. Aug., lib. 2 Operis imperfecti, n. 175 : « Ad hoc jam responsum est, non  
» repugnare omnibus multos, quia ipsi omnes non pauci,  
» sed multi sunt. »

*Quidam distinguunt textum,* et dicunt sanguinem Christi et pro multis efficacia redemptionis effusum fuisse, et pro omnibus in intentione Christi : hoc quidem verum est, et doctrinæ quam tuemur optime congruit.

*Obj. 3º.* Christus dicit, Joan. x, 15 : *Animam meam pono pro ovibus meis;* et ib. III, 14 et 15 : *Exaltari oportet Filium hominis, ut omnis qui credit in ipsum non pereat, sed habeat vitam æternam :* ergo tantum pro ovibus suis et pro iis qui crediti sunt mortuus est, non vero pro omnibus.

*R. Nego conseq.* Certum est quidem illum animam pro ovibus suis posuisse, et in cruce exaltatum fuisse, ut in ipsum credentes vitam habeant ; sicut serpens æneus olim exaltatus fuerat in deserto, ut Judæi eum aspicientes, a morsu serpentium sanarentur : at cæteri non excluduntur ; imo, supponitur omnes ad fidem vocari ut non pereant. Ergo.

*Obj. 4º.* Joan. XVII, 9 : *Non pro mundo rogo, sed pro his quos dedisti mihi.* Unde Christus non orat pro mundo, id est, pro peccatoribus mundum constituentibus : atqui Christus non mortuus est pro iis pro quibus noluit orare : ergo non mortuus est pro omnibus.

*R. Dist. maj.* Christus non orat pro mundo, oratione speciali vitam æternam obtinenti, *conc.*; nullo modo orat, *nego maj.* Quemadmodum enim duplex est gratia, sufficiens et efficax, ita et duplex distinguitur oratio Christi : alia enim *specialis* et *efficax*, quæ infallibiliter producit electos, et ideo pro aliis non fit ; alia vero *inefficax*, sed

culpa hominum qui gratiis sibi oblatis non recte utuntur. Porro Christus mundum et peccatores ab hujusmodi oratione non exclusit : dicit quippe in eodem capite, v. 21 : *Rogo ut credat mundus quia tu me misisti*; et moriens dicebat : *Pater, dimitte illis, non enim sciunt quid faciunt*, Luc. xxiii, 34. Ergo.

Unde dici non potest cum Jansenistis Christum orasse 1º pro quibusdam ut salvi fierent, 2º pro aliis ut crederent, 3º pro aliis ut charitatem haberent, quasi pro ceteris non orasset; oravit enim pro omnibus, licet diversis modis.

*Inst.* 1º. Christus certo sciebat qui salvandi, quive dannandi forent : atqui pro certo damnandis orare non debuit : ergo.

*R. Nego min.* Si enim Christus futuram damnationem non prævidisset, orare potuissest pro damnandis, ut eis obtingeret gratias ad conversionem et salutem sufficietes : atqui prævisio ejus impedire non potuit quin easdem gratias pro eis petere valeret, siquidem prævisio Dei in liberas hominum actiones non influit : ergo.

*Inst.* 2º. Pro certo damnatis orare non licet : at non magis licet pro certo damnandis orare, quando ut tales noscuntur, quam pro damnatis : ergo.

*R. Nego min.* Tamdiu enim licet pro damnandis orare, quamdiu oratio ipsis prodesse potest : atqui, licet prævi-deantur damnandi, oratio ipsis prodesse potest dum vivunt, siquidem realem habent facultatem ad meliores fruges redeundi, et salutem consequendi, quod jam damnatis impossibile est : ergo.

*Obj.* 5º. S. Aug., Epist. 217, hæc habet : « Unde manifestum est eos qui huic resistunt perspicuae veritati, non intelligere omnino qua locutione sit dictum, quod omnes homines vult Deus salvos fieri, cum tam multi salvi non sint, non quia ipsi, sed quia Deus non vult, quod sine ulla caligine manifestatur in parvulis. » Ergo re ipsa Deus non vult sincere omnes salvos fieri.

*R. Dist. conseq.* Deus sincere non vult, sensu Semipelagiano, omnes salvos fieri, *c.i.c.*; sensu catholico, *nego conseq.* Etenim S. Doctor hic disputat adversus Pelagianos et

Semipelagianos, qui volebant 1º gratiam ad salutem omnibus oblatam esse, et unumquemque propriis viribus ea, sine novo Dei auxilio, uti posse ; 2º hanc gratiam secundum merita tribui, ac consequenter initium salutis, non Dei, sed hominis esse ; 3º homines salvandos vel reprobados fore, non secundum merita aut demerita quæ haberent morientes, sed quæ habuissent si diu vixissent : unde salus parvolorum ante usum rationis decadentium ab operibus quæ gessissent adulti pendebat, juxta ipsos. Porro S. Aug. hos pravos sensus refellit ostenditque gratiam nos prævenire, pro meritis non concedi, et salutem tribuendam esse Deo, qui peccatores *ad seipsum omnipotentissima facilitate convertit, et volentes ex nolentibus facit.* Ideo probat in eadem epistola pro omnibus orandum esse, ut Deus sua misericordia eos ex nolentibus faciat volentes : atqui certe ad orationem pro omnibus non hortatus esset, si persuasum non habuisset Deum sincere velle omnes salvos fieri : ergo.

Eodem sensu explicandi sunt alii textus S. Aug., S. Prosperi, S. Fulgentii, etc., qui ab adversariis objici solent.

*Inst.* S. Aug. textum B. Pauli, *omnes homines vult salvos fieri*, considerans in triplici sensu accipi posse contendit : scilicet 1º eo sensu quod Deus velit omnes salvare qui salvantur, tanquam *diceretur nullum hominem fieri salvum, nisi quem fieri ipse voluerit* (Enchirid. cap. 103); 2º eo sensu quod vox *omnes* posita sit pro generibus, v. g., Judæis, Græcis, barbaris, etc., adeo ut sint electi in cunctis generibus non vero pro individuis (de Correptione et Gratia, cap. 14) ; 3º eo sensu quod, ignorantes quinam sint prædestinati, salutem omnium velle debeamus (ibid. cap. 15). Unde sic : In triplici hac expositione sensus verborum Apostoli ad solos electos restringitur : ergo S. Aug. arbitratus est verba Apostoli de solis electis intelligenda esse.

*R. Nego conseq.* Nam 1º triplicem interpretationem exponendo, nullam amplectitur : dicit tantum hæc Apostoli verba sic intelligi posse, eosque sensus admisit tanquam possibles, ut objectiones Pelagianorum predictis verbis